

詩云。苦憶陽湖盛夫子。三年高臥釣魚磯。窮來吾道有真吉。老去醉鄉無是非。明月儘教穿戶入。白鷗長許到門飛。漸予志漫存溝壑。夢想滄江未得歸。送陳孝則還雲間云。握手窮途意倍親。今朝相送欲沾巾。忽看柳色青春半。愁對梅花白髮新。萬事蹉跎備更閱。十年辛苦竟誰陳。同嗟漂泊干戈日。別後音書莫忘頻。山游卽事云。山脚稱翠浪作寒。山腰老紅香未殘。村家徑窄樹當戶。兜子過來妨客冠。可謂幽絕。

秀水周青士。國變後。隱居市廛。常醉書一詩云。似士不游庠。似農曾讀書。似工不操作。似商謝立趨。立言頗突兀。應事還鶻疎。飢凍不少顧。吟詩作歡娛。直可作一篇小傳讀。青士所著采山堂詩集。抗音吐憤。不愧作者。晚年漸羸平易。頗有老嫗能解之風。錄其五言數什如下。九日客中寄弟云。九日離亭雨。三年異國愁。故園兄弟在。爲我一登樓。結交云。弟兄本同氣。所稟或有殊。一朝意氣乖。視然如道塗。結交乃異姓。反覆誠可虞。肝膽空自許。安知非見誣。徒然事談笑。緩急何所須。嗟哉今之人。結交良已愚。哭然公云。遠公釋門老。獨臥孤峯雲。隱德世莫見。高風余夙聞。松杉手自種。虎豹時爲羣。嘆息永徂謝。山室空夕曛。七言懷舊。爲亡友王翊作云。南

浦驚心憶往年。送君獨上子猷船。烏衣舊巷看猶在。馬首長塗信可憐。烟樹燈深過嶺日。寒潮風急渡江天。甯知陸賈遺歸棄。空爲王孫給墓田。

屠曠字開伯。與周青士王介人同里居。國變後。以布衣終。贈別袁重其云。高飛鴻鴈滿關河。此日寒江起夕波。庾信哀時常作客。梁鴻去國獨行歌。霜淅茂苑清砧急。月照荒臺落葉多。爲問吳中舊知己。空山叢桂近如何。慈鬆魏壁息賢堂。集中載一律云。汝髮黑如漆。吾面白可憐。匆匆逢上巳。袞袞話當年。月落吳關樹。春深攜李田。明朝須解脫。不放老夫眠。卽宿開伯宅中所作也。又桐城張履祥爲開伯題卽居詩云。霍原六聘山。焦先三詔洞。漁子定迷津。祇莫桃花種。魏張皆勝國遺老。同足俱行。有由來矣。

海甯朱近修。早負文名。喜表種奇行卓節之士。所傳花隱道人魯顛諸傳。尤有光彩。詩亦自然名貴。不事矜鍊。桃葉歌云。桃葉含桃花。花落子稠疊。子熟生桃蟲。蟲還食桃葉。飲云。萬里兵猶動。三年客竟歸。偶尋芳草路。因見落花飛。野燕隨風側。溪魚得雨肥。悠然堪獨醉。借與壯心違。京口遇兵云。江水茫茫殺氣并。淒淒畫角戍樓聲。舳艫夜月中流斷。羽檄秋風隔岸明。大將

營開揚子渡。健兒馬出潤州城。關門老客頻相戒。湖海於今罷遠行。經過有感云。金粉瓊膏化作灰。美人池館半青苔。只今寂寞斜陽裏。多少東風燕子來。其他五言如十暑杜陵鳥。一寒范叔袍。秋懸遊子夢。日落異鄉山。泪以傷時盡。愁須醉日多。妻子他鄉泪。文章浩劫灰。七言如牧馬官同張萬歲。進賢賞並鄂千秋。關河秋色三千里。風雨冬青十二陵。長江險失韓擒虎。晉井春埋張麗華。三楚風塵新幕府。六朝烟雨舊樓臺。皆佳句也。君名一。是國變後。初擬削髮為僧。其門弟子挽其主文社。遂埋身於文字焉。著有可為堂集。意謂時事尚可為也。其處心積慮可想。

嚴伯玉名燦者。常熟嚴文靖公之孫也。常入權在田相國幕。學畫戎機。遭國變。隱居粵西。種人洞。不知其所終。著有滄浪集。蘊山草。錄其五律二什。秋日過萬里橋見朱雲子寄詩。因憶舊事。慨然有作云。寥落天南鴈。淒涼見素書。故人千里外。舊事十年餘。壯志愁銷盡。閒情賦久虛。不知憔悴者。錦瑟意何如。過清溪驛和題壁均云。風塵天下滿。此地尚烟霞。叢篠臨江偃。寒花倚石斜。輕雲歸暮嶺。落日戀平沙。何限河山意。漢西又寄家。其妾鄭淑芳。吳江人。亦工詩。如洗手

自簪十指甲。何因又長兩三分。玉香舊譜題文句。瑤瑟新絃續命絲。趙瑟欲調無奈調。楚腰先細不堪愁。香婉約可誦。

蕭田余澹心。文酒跌宕。少有聲於時。遭國變。流寓建康。慨金陵懷古詩。慨當以慷。大江南北。爭傳誦之。謝公墩云。高臥東山四十年。一堂絲竹敗符堅。至今墩下蕭蕭雨。猶唱當時奈何許。孫楚酒樓云。江南城西酒樓紅。無數楊柳迎春風。孫楚去後李白醉。千年不見紫髯公。雨花臺云。雨花臺上草青青。落日猶銜木末亭。一綫長江三里寺。千年鶴唳九秋螢。勞勞亭云。蔓草離離朝送客。驪駒愁唱新亭陌。夜深苦竹啼鷓鴣。空林獨宿頭皆白。余又見其手題棟樹亭畫冊。有傷心好似冬青樹。三月東風哭棟花之句。筆法亦豪放可觀。王漁洋極重其人。寄懷詩云。千載秦淮水。東流繞舊京。江南戎馬後。愁絕庾關成。鍾阜蔣侯祠。青谿江令宅。傳得石城詩。腸斷燕城客。澹心名懷。著有板橋雜記等書。

黃崗杜于皇。少負不羈才。欲赫赫著奇節於天下。潦倒日久。不自聊賴。遂刻意為詩。以見志焉。國變後。僑寓金陵。錢牧齋嘗造訪之。意託病弗見。于并世人。獨推重沈眉生。徐昭法。自以為

弗如著述甚富。已博者爲繼雅堂集。咏坡公云。堂堂復堂堂。子瞻出峨眉。早讀范滂傳。晚和湖明詩。合肥龔鼎孳見之。擊節不置。以爲二十字說盡東坡一生。泰州云。窮海三秋盡。扁舟百里行。夕陽無近色。偏照遠帆明。咏焦山云。出郭來差遠。憑高望獨深。江分神禹跡。海見魯連心。密竹藏金像。回流灌石林。擬尋幽絕處。却誦白頭吟。佛殿云。大樹風多葉盡飄。莊嚴猶自見前朝。黑頭江令殘碑在。不記君王舊姓蕭。白雲菴云。松篁自結一幽蹊。積葉柴門咫尺迷。我記白雲菴去處。過山又過小橋西。當啓禪之際。楚人無不步趨鍾譚者。于皇獨別開畦徑。自成一家。又送入蜀云。古意淮南葉。他鄉劍外州。漁洋極稱賞之。晚自號茶村道人。

衡陽郭季林。名履謙。與夏汝弼爲同鄉。國變後。隱居石獅嶺下。竹塲藥圃。日吟嘯其中。足未嘗履城市也。著有涉園心草。風致灑然。頗近譚竟陵。觀覽云。性情皆有託。不但得爲人。卽如彼風雨。孰知非周親。至德不礙已。豈復以等倫。秋雨云。天山不可名。雲氣與之平。暑退石苔潤。涼生樹落輕。細聽蟬翼寂。遙感鷹來聲。澹爾平林際。深黃半熟橙。過劉子參山亭云。萬山環列一茅亭。兀立橫空出杳冥。開設高人長飲此。祇堪獨醉不堪醒。

故明滄桑之際。士大夫以文行相高。往往豎立名宦。被粉帶羅。往而不返。時則吳中徐昭法。宣城沈眉生。雖躬耕窮壤。不與世接。然尚有稽墨流徽人間。獨上元張瑤星。寄身攝山僧舍。銷聲韜迹。樵藝自給。文人騷客之來往於茲山者。舉不知山中有人。然瑤星素工吟咏。著有古鏡齋詩內外集五言。雜詩云。淺水平沙路。淪漣繞一村。夢回天地老。亂後友朋存。芳草生幽澗。新霽帶小園。看山廣武後。久不望中原。七言送葉菜木人闕云。野鶴孤蹤道士顏。層林子裡入關關。不知烏石峯頭路。可似江南雨後山。瑤星於崇禎間會官錦衣。六十初度詩所謂當年執戟侍明光。親見彤雲捧玉皇是也。瑤星原名鹿徵。後更名怡自。號白雲道者。其先人可大。官至登萊總兵。殉登州之難。賜諡壯節。亦能詩。錄其書邊事一律云。無端小草出登壇。壯士徒歌易水寒。枉把全師輕一擲。遂令宿將盡三韓。腐儒誤國由房瑄。野老吞聲恨賀蘭。豈是彼蒼開殺運。祇因人事自摧殘。

南海屈山人大均。當明之亡。與陳恭尹。梁佩蘭均以遺民稱詩。嶺南世號三君。分道揚鑿。各臻其盛。然山人詩尤蘊藉。亭林集載其贈甯人詩云。鴈門北接常山路。爾去登臨勝概多。天上三

關前湖漢雲中八水會渾河。飄零且覓藏書洞。慷慨休聽出塞歌。我欲金箱圖五嶽。相從先向曲陽過。唐人答詩云。弱冠詩名動九州。紉蘭餐菊舊風流。何期絕塞千山外。幸有清樽十日留。獨漉泥深音畢沒。五羊天遠白雲秋。誰憐函谷東來後。班馬蕭蕭一轍裘。大有靈蛇相憐之意。然二人平日相慕之深。亦可推知。又漁洋詩話載其客代州詩云。三年爲客渡滹沱。聽盡悲茄出塞歌。白髮不愁明鏡滿。清霜只恐鴈門多。讀此可以想見其境格矣。山人名紹隆。少爲番禺諸生。遭亂祝髮爲僧。名曰今種。字一靈。嗣返儒服。乃更今名。字翁山。余從國朝禁書總目等書中攻其遺著。有黃卯軍中集。翁山文外。翁山詩外。翁山易外。四朝成仁錄。廣東新語。登華山詩如干種。

史忠貞之節烈。世所知矣。其弟可程。士林至不屑齒及。某弔忠貞詩。至有南枝向暖北枝寒之句。此實二百餘年一大冤案也。可程字赤豹。號遠菴。崇禎癸未進士。頗有所著述。北京陷。可程屈於李自成。旋即逃歸南京。奉母家居。閱四十年。實未嘗仕我朝也。以視梅村諸子。不已多乎。鄧孝威詩觀。曾載其至廣陵拜先閭部墓五律二什。極蒼楚之致。多誦之者。余不載。載其奉答

顧甯人旅居平陽見懷之作云。西去憐君似轉蓬。傳來消息到牆東。曠懷晉國雲山遠。回首吳門烟水空。世局頻勞悲失馬。天涯漫遣暮飛鴻。王孫何事歸猶未。芳草萋萋滿舊叢。懷古遙憐處處同。青鞋布襪御長風。猶聞采蕨思殷社。漫道歌薰入舜宮。山色千重遮冀北。河流萬里下滹東。看君行邁劬勞甚。廬下誰知五噫鴻。其志趣可以想見。可程與顧甯人唱和極多。皆可傳誦。如太原喜晤甯人先生賦贈四首其二云。門掩高槐旅舍幽。怪來細字寫蠅頭。中原偏作名山計。說到昌平必淚流。其四云。見君已是白頭時。塵世茫茫問所知。我自歸來甘閉戶。相思頻展扇頭詩。甯人答詩有云。想見蕭寺中。抱膝苦吟哦。古人尚酬言。亦期相切磋。願君無受恩。受恩難負荷。願君無倦遊。倦遊意蹉跎。可程答句有云。飢來四方走。避惠如避鉞。又云。屢讀未及終。汗浹敝衣舊。白贖適膏令。蠲懷屬悽悽。資世何必多。儉德足自占。聽承仁者贈。拜手想三楸。誦此。則可程之行徑益大明矣。

明社既屋。義節之士。倦倦不忘故國。如錢塘趙瑜亦其人也。瑜著書甚富。嘗以三月日往六橋。弔桃花。成桃花曲五闕。非熱審其身世者。不能知其詞之哀也。山坡羊云。誰繪就河陽圖畫。却

向這西湖懸掛。怪宵來狂風不休。看紛紛紅雨漫天下。假若難折他。被催花御史拿。到而今禁不住。翠哥只把東風罵。何事天公見識差。波查。葬西施。向水涯烟沙。嫁王嬙。不返家。見灑袍云。十里虹橋緊跨。總拋開旖旎。掃盡繁華。長堤那得錦屏遮。穩香一路由人闖。珠零玉碎蘭舟漫。撞。紅愁紫怨春醪漫。淚蘼蘇。怎禁得千行下。解三醒云。貴客來。辜負了軒車驥馬。富家來。消停起檀板琵琶。才子來。詩成空返立都鴛。美人來。休認做玉真家。繡流來。何曾悟得三摩義。羽士來。未必燒成九轉砂。有一種狂逞輩。痴呆煞。肚皮裏惟有飲嘍。耳朶裏同聽喧嘩。玉抱肚云。吾心牽惹。急急孜孜憐花惜花。把一盃澆向花前。花知道可能鑒。日之夕矣不歸家。恨不坐到黃昏再哭他。皂角兒犯云。六朝春。總屬虛花。三月景。一番閒話。說甚麼絳雪胡麻。想都是塵埃野馬。沒和干。拋開罷。眼也斜。枝頭還剩一些些。風休刮。雨莫加。殘春尙值千金價。尾聲云。人生難得長瀟灑。費幾杯浪酒與閒茶。你看宋苑秦亭。又增一番新綠也。

江南古稱帝王州。泊夫前明。神鼎播遷。一片龍蟠虎踞之場。頓成麥秀黍離之局。覽前物而懷之。尋生平于想像。鍾儀幽而楚奏。莊舄顯而越吟。此亦人情之尋常哉。如顧與治過秦淮詩有

云。何人對此最傷情。風前獨下鍾山淚。遊子昔言風景殊。居人倍感山河異。余生曾作太平民。及見神宗全盛治。當時祇道長於斯。四十年中幾變易。渡頭猶是六朝烟。畫閣珠簾久頓顛。鸞首全隨戈甲人。馬嘶亂入王侯地。誰之至爲悽愴。與治名夢游。明貢士。書法重一時。少負詩名。崇禎盛日。頗以閒暇恣意詩酒。晚丁喪亂。階長途遠。子身無所歸處。因題以終。故其詩獨哀以思焉。此外金陵懷古詩。最佳者吳縣楊煥金陵雜詠云。形勝瞻天闕。飄零問故宮。金笳淮水北。玉露將陵東。百戰黃圖盡。重來紫氣空。西京者舊在。辛苦說關中。楊亦勝國遺逸。讀徹金陵懷古云。石頭城下水淙淙。西望江關抱龍。六代蕭條黃葉寺。五更風雨北門鐘。鳳凰已去臺邊樹。燕子仍飛磯上峯。坏土當年誰敢盜。一朝伐盡孝陵松。讀徹號倉雪。字見曉。本趙氏子。遭國變。祝髮於昆明妙湛寺。不肯事異姓焉。顧炎武白下云。白下西風落葉侵。重來此地一登臨。清簫皓月秋依壘。野燒寒星夜出林。萬古河山猶有主。頻年戈甲苦相尋。從教一掬新亭淚。江水平添十丈深。吳顯金陵云。由來天塹是虛名。何用千尋鐵鎖橫。采石至今聞故國。寒潮猶自打空城。六朝已嘆風流賦。十廟徒中帶鐵盟。回首景陽遺篋失。尙餘百八梵鐘聲。其兄翻亦有一

絕云。戎車已見借包茅。十四樓成語藥郊。一自燕山開御苑。月明南內鎮蠅螭。又武進薛案云。野曠風禽捷。江空石燕輕。年年春草綠。不忍上臺城。案字諧孟。晚爲僧。號米一堆和尚。又曰米堆山。自謂采去冠成采。去髮成米。米堆山。穴中山名也。嗟乎。劉賓客之山開故國。杜樊南之烟籠寒水。許鄂州之玉樹淞殘。王荆公之蘭祖孤身。詞非不工。然以與顧楊諸君子較。則身世有間矣。雖然。江南斷腸句。世無賀方回。誰復解道。

桐城錢幼光垂鏡。亦有金陵印事云。秋山無樹故嗚咽。漫度支筇未忍登。荒路行愁逢匹馬。窮交老盡變高僧。鐘樓自吼南朝寺。佛塔還燃半夜燈。莫向雨花臺北望。寒雲黯淡是鍾陵。先生心存忠愛。性耽吟咏。屢入危邦。事唐桂諸藩。自謂每有感觸。輒託諸篇章。以自見。晚更名澄之。字次光。著有易學詩學。莊騷合話。戴山閣稿。田間文集。其弔黃道周詩。尤不盡人亡國廢之感。先生蓋黃公所荐士也。詩云。二月長江天晝昏。都人爭舉李膺幡。笑將涕淚辭知己。坐索衣冠謝主恩。無路請還先軫首。何人招返屈原魂。當年北寺留皮骨。此日南朝仗爾存。行宮詞云。宮闈沉沈到未眠。大家柔燭在甘泉。憑嶸御筆珠簾裏。夜半頻聞手詔傳。外廷章奏晚猶通。侍史

開封五夜同。傳道君王看不及。黃羅親裏送中宮。旌旗十萬護乘輿。二聖宮中共起居。長信宮人騎馬出。從龍只有五車書。均事唐王時所作。當弘光時。客烏善錢吏部仲馭家。馬阮方藉朱紱。鐵擗嚴疏藩。謀危宗社。一疏逮捕諸清流。先生名亦在捕中。姜行人攻以計脫之。幸免于禍。顧甯人園先生詩云。一別秦淮將廿載。天涯垂老看猶在。斷烟愁竹泣蒼梧。秃筆悽文來漲海。燕市雞鳴動客輪。九門馳道足黃塵。相逢不見金臺侶。但說荆柯是酒人。

太原高士公之宅。明之亡也。當興復之志。仰視天。俯畫地。無間者二十年。後見本朝根株既深。遂屏絕世事。博究天人之學。兼工篆隸諸書。時人得其一字。重之不啻千金。余嘗於友人某君處。見所藏鄒子林復社六大家合璧第二畫冊。有公之宅手題古風十二詠。皆工。世所未見。亟錄出之。閉梅閣云。清晨下蓬閣。但爲梅花起。心遠屢欲前。願已失之過。晚步明月歸。覺來比舍是。鼻觀能覺人。春風自莞爾。臥雲望云。白雲狎無心。飄然若孤鶴。朝從川上來。浩漭秋宇廓。既乏作霖雨。終欲笑龍。嬖所思餐霞人。相將臥杖屨。冰壺井云。玉色澄冰壺。下疑明月窟。湛湛映千春。一勾孰可竭。於時思丹砂。誓將刻肌骨。神仙可寓言。其事亦恍惚。玉鑑池云。玉池如鑑平。

天開月華色。浩然思箕穎。清風將安極。我持一瓢餘。焉得不努力。澄壺類淵古。渺焉非所惑。獅子峯云。陰風偃勁草。未至毛髮豎。劃然天地晦。一吼破雷雨。特兀古已尊。勢欲吞貔虎。何當問巨靈。心儀竟莫吐。指柏軒云。禪宗示一指。其意揭嶽表。怡然柏樹間。相視輒了了。我希無言師。大道懼莫曉。危坐始自言。多譽孰非擾。吐月峯云。危峯挾陰霓。萬象值其內。炯然吐白臺。了若無所礙。平生抱幽壑。舉足時養晦。道心方自開。孤寂啓宵昧。脩竹谷云。朝陽下幽谷。綠霧寒不定。回巖時冷然。一鳥忽深應。初疑風雨懷。便覺山水勝。長嘯殊未言。瑤華竟相贈。大石屋云。石屋無四鄰。端居多坦易。不識我言間。但覺巖穴肆。有時延清風。或與白雲至。何必賂遠才。卽此經世意。立雪堂云。道在豈外人。不能譽以口。虛室止吉祥。所得亦非偶。古有立雪堂。來者孰曰否。道同轍分漸。莫懼曠日久。小飛虹云。爲虹作長橋。五色騰光采。凌雲形飄蕭。引領全所在。我思乘無倪。千載儻相待。會當從津梁。因之叩眞宰。含暉峯云。儻忘始自佳。頗復實心過。何須登雲梯。終日得靈悟。連峯意不盡。一拳獨屢顧。遊遊泉石間。清暉且留住。公之它姓傳名山。宇青主。余又從他處見其題胡季子詩稿後云。風流胡季子。花筆起河西。鮑選徐陵勝。奇添李賀使。

大巫爲氣盡。老麝但頭低。公子爭羨焉。文章有馱驥。胡名廷汾陽人。公之它門弟子。亦一奇才也。

獅子林復社六大家合璧第二畫冊。青主題咏已錄出之矣。冊末國初諸老如施愚山。尤展成。皆有跋語。誠希世之珍也。外此惟程穆情分詠十二什。皆用高青邱原韻。問梅閣云。昨夜山中雪。寒梅開幾許。日暮倚竹林。脈脈無人語。臥雲室云。萬壑千巖裏。白雲未開。此中高以隱。時有鳥聲來。冰壺井云。古井水不波。清冽心齒冷。松葉火初紅。朝來級修練。玉鑑池云。一片空明水。微風澹欲波。我來越鑑影。只恐鬢絲多。獅子峯云。萬壑起風聲。羣獅吼山夜。中有忘世人。結屋松根下。指柏軒云。清風颯然來。吹醒忘機客。枯坐澹無言。堅貞如此柏。吐月峯云。空山寂不喧。待此山中月。忽然月上來。恰補高峯缺。修竹谷云。天外落奇峯。恰當修竹後。來參玉版禪。翠滴滿山口。大石屋云。誰復混沌鑿。四壁有奇紋。一閉今千載。重重白雲封。立雪堂云。天寒山色靜。風雪夜深時。獨對千峯立。高人應未知。小飛虹云。渾疑昨夜雨。蟬蛻見清朝。時有聽泉客。支節渡小橋。含暉峯云。山影靜含暉。疎林澹夕暉。娛人蒼翠色。坐對憐忘歸。種情名遠。號垢區。別

字垢山道人。歙縣人。布衣。善篆籀。圖章稱獨步。隱居金陵。壽九十餘。著有程穆情詩。蕭然吟若干卷。至乾隆時。其版盡銷毀矣。此冊近爲長沙張氏所藏。余得一觀。不得爲非眼福也。

明之末年。新安以布衣稱詩者二人。一吳非熊。一程孟陽。皆在萬曆間聲名藉甚。然程詩尤佳。五律云。相逢當別路。歸去欲何之。江水曹娥廟。湖山賀監祠。秋愁兼雨重。旅望入秋悲。憶憶江東侶。論文復幾時。七絕云。青門楊柳白門鳥。秋雨秋陰齋酒壚。何處鷓鴣最相憶。綠絲風雨暗西湖。其他警句。如瓜步江空微有樹。秣陵天遠不宜秋。夢裏楚江昏似墨。畫中湖雨白於絲。遠鵬如壓飛水面。亂帆疑葉下吳頭。多年華髮絲相似。三月春愁水不如。城上雪聲遊子屐。縣南風色酒人家。皆傳誦一時者。著有松圓浪淘。耦耕堂。偶菴等集。皆乾隆間禁書也。或謂其格調卑卑。才庸氣弱。毀之過甚。殊不足以服其心也。孟陽名嘉慶。

嘉魚熊魚山開元。崇禎間以建言削籍遣戍。國變後。祝髮爲僧。名曰正志。字樂菴。與董南澗同受戒於職起大師。居蘇州之華山。著有華山紀勝集。詠鳥道臥獅石云。從來入蜀歎崎嶇。九折何如此路迂。若是香林黑獅子。向前翻擲肯踟躕。穿雲棧云。盡日凝雲谷口封。悔還飛鳥亦迷

蹤。何如近借齋厨鉢。輟取耕烟白耳籠。

桐城方密之開學。夕堂永日錄嘗稱其詩矣。而未知其工繪事者。嘗見所繪山水一幀。淡淡著墨。極疎遠之態。自題二十九字云。截斷紅崖石萬層。衝舟碧落松千尺。特地爲中峯拈出。拈箇甚麼。可惜可惜。署銜爲無可道人。詞甚悲痛。未附方望溪跋云。先叔祖文忠公字密之。諱以智。號曼公。前明崇禎庚辰進士。弱冠負盛名。與雲間陳子龍投分最久。復社諸公。皆以聲氣名節相推尚。釋褐時。真述公撫楚。忤時相。被逮下獄。具疏請代。上稱其孝。寬乃白。甲申南奔。仇怒納回。遂流離嶺表。出世外。嘗被累。環以白刃。終不屈。晚乃懸跡匡廬青原間。從遊士稱無可大師。史號藥地。豐意忠難。譏笑自如。卒於萬安。歸葬浮渡。所著有通雅砲莊。物理小識。鼎新浮山詩文集。數十種行世。諡文忠。江子長先生嘗稱爲四真子云。蓋所謂真孝子。真忠臣。真才子。真佛祖也。此幅乃爲嶺山中峯張白雲先生作也。筆墨高古絕倫。藏之名山。得垂不朽。亦幸矣哉。

庚戌壬午秋月。

密之所爲詩。嘉慶嶽書。卓然名家。著有流寓草。浮山全集。鈞臺云。鈞臺何處崎嶇。當時必有白尺

釣竿千尺綸。乃可垂釣桐江濱。祠堂草木歲時新。子孫上食皆不貧。先生無行事。先生不著書。但能不肯爲人臣。今人不能寒富貴。乃以藏拙識古人。我亦停舟暫釣桐江水。桐江千年少泥滓。嗟乎不得故人爲天子。一棺之士聊葬此。看月云。一片鍾山月。那從嶺外看。昔嘗臨北關。今獨照南冠。萬里天難問。三更影易寒。夢中兒女路。莫憶舊長安。聞雁云。衡陽無雁到。今過嶺南飛。世亂成行少。家亡寄信稀。鷓鴣聲共苦。鸚鵡語全非。鄉國爲關塞。明春帶我歸。逍遙洞云。天地一時小。惟餘谷口寬。名山藏日月。野老剩衣冠。石向何人語。春知此歲寒。幾家烟火在。題作鹿門看。又詠下客云。人不識事務。進退良足惜。纔出魏其門。謀爲武安客。良可爲今之朝秦暮楚。狗苟蠅營者。下一針砭也。先生永明時應召入粵。求以史局自效。後祝髮於梧州城。釋名弘智。

申涵光字孟和。一字鳧盟。直隸永年人。有文章志行。以詩名河朔間。同學多顯者。申獨隱居不出。與同邑張履與蓋。雞澤殷伯巖岳。曲周劉津逮逢源。邯鄲趙秋水湛並齊名。人稱爲臆山先生。著有堯盟集。顧甯人贈申公子而光詩云。十載相逢汾一曲。新詩歷落鳴寒玉。靈靈山前百道泉。臺駘祠下千章木。登車衝雨馬顛嘶。似惜迎錢錦障泥。并州城外無行客。且共剡琨聽夜雞。

張蓋。字覆輿。一字命士。永年人。逸民也。少敦氣節。以詩名。與申涵光。殷岳。稱畿南三才子。遭國變。浪遊齊魯楚豫間。偶有名酒。無夕不飲。醉輒效唐衢泣數行下。詩尤哀憤過情。涵光輯其遺稿。得百餘首。客中送人歸鄉云。雲沒青山頂。風含白岸波。離情秋更苦。歸路雨偏多。小巷臨漳水。荒林帶女羅。附書愁不達。汝到定相過。同申鳧盟殷伯巖諸子集。飲云。屢宿陶潛宅。今來得數公。竹斜燈影外。人醉雨聲中。老情歡娛異。交緣出處同。病軀先就榻。應恕鹿皮翁。又贈申鳧盟詩云。草澤賢豪盡上書。李章閣外卽公車。我同漁父因衰老。却有涵光是隱居。

唐訪字周之。號汲庵。湖南武陵人。遭國變。削髮爲僧。築食苦庵以終。更號食苦和尚。且自爲之記。其略云。和尚早遭茶苦。十歲遭父冤。中遭刑。已仲復厥。今臘已甚。和尚所遭。尙未有艾也。和尚三遊燕。四入雒。一過秦。再歷吳。越晉楚。閩粵乃反楚。風帝京。記華山。訪侯羸。豫讓甲姑蘇之臺。問五湖之棹。漁舟不返。屈宋同歸。每入名山。喜獨遊。夜遊。雨遊。雷遊。雪遊。石喜。蓋。僧喜。瘦。哀。

燃炬夜坐大石上。喜臥佛閣反鏡。鬼叩門。飢鼠竄瓦。喜與古人遇。牽其裾。平反其獄。不受古人欺。和尙喜築庵。凡遇山水佳處。誅茅蒼竹。負石洗石。扶石起。對立如人。與揖。與談語。與默坐。然後置庵。庵成。居十餘日。卽厭棄別徙如前。庵前高竹數本。短竹百數十本。庵側水高二尺。來自二溪。至庵去復分。野草無算。白鴨一足。波庵後峻嶺無人跡。有木客。有大嫂。時似老翁。咳窮奇。羶穢。毘。殺。攫。攫。猩。拂。拂。玄兔。白鹿之屬。無算。和尙每早起。白飯二盂。苦茶十二盞。酒無算。詩或一二首。或數十首。喜怒笑罵。發狂無聊。往來唱和益無算。和尙以有明萬曆四十五年丁巳十月初二日生。行年三十有一歲。又八十八日。爲戊子元旦。築食苦庵成。乃告母兄及妻妾暨友人。自今以往。呼我食苦和尙。以戊子元旦始。元旦後六十九日。寒食前一日記。

朱議霽子用霖。南昌人。寧王權之支孫也。初見天下將亂。專意結客。師事段大僕。令讀大學衍義。以期實用。交江夏張若仲。傳其擊刺術。又訪士於樂平王綱。王綱曰。子同里彭躬庵。方今俊傑也。而外求乎。先生初與躬庵各負才。不相能。至是傾身交躬庵。躬庵常外出。先生家居兼督兩家事。旣而歎曰。不力耕不得食也。遂率妻子種茶于冠石。更姓名曰林確齋。酒後輒慷慨悲

歌。見精悍之色。王漁洋詩話謂有林確齋者。亡其名。江右人居冠石。率子孫種茶。躬親舂鏹負擔。夜則課讀毛詩。離騷。過冠石者。見三四少年。頭著一幅巾。赤脚揮鋤。琅然歌出金石。竊歎以爲古圖畫中人。不知其卽般之箕子。周之頑民也。卽先生也。嗚乎。中國全盛。四海一家。及其衰也。子孫無立錫之地。泣箕子於故宮。遷頑民於洛邑。吾固不暇爲先生悲也。

躬庵名士望。易堂九子之一也。三訪魏禧于寧都。有恥躬堂詩集。詠小姑山云。昔日元道州。曾運醉魚舫。豈若茲石奇。兀傲羣流上。日月與俱浴。雷雨亦相盪。樹無凡鳥栖。巖共山僧養。苦節風波中。獨立本無黨。湖山晚眺云。湖水尙如昨。樓臺望已非。可憐相識燕。猶向舊家飛。

石室詩話錄侯朝宗詩二章。其過鳳陽陵園云。帝里龍興日。荒原秋復春。故宮交鼠跡。深夜出蛇神。禾黍君臣淚。衣冠戰伐塵。昔天規王氣。固矣採薇人。送顧副使入楚云。舊京西去楚江東。萬里長遊感慨中。古月還窺神女廟。孤舟直破大王風。浮沈漢祚終劉表。伯仲周郎是呂蒙。回首故人勞望眼。莫遲佳信負春鴻。余以爲不盡故宮禾黍之思。近遊燕市中。復觀其所作管夫人畫竹記手跡。流連感慨。一往情深。如謂元室待勝國之厚。尤有言外之意。且此文爲遺集所

不載。是則尤可珍貴者也。錄其文如下。曹州余尉出畫竹一軸。以示余曰。此元齊夫人所作也。出自大內。明亡後。遊燕市而得之。嗚呼。金開書畫之在大內也。中貴人掌之。玉其價而金其誠。而猶誌之以別。軍曰。秘閣之寶。今出自天子之宮。而入尉之手。廢典之故。可以感矣。然方其在內也。雖玉擅而金絳。而天子倦萬幾。或終歲不觀。暇則妒寵爭妍者。各趨而前。書畫不能以其落莫爭也。雖中貴人掌之。而彼日徒營營爲酒食醉飽。則門難朝。亦不知觀。而天下之文雅鑒別者。固雖欲觀之。而秘閣禁嚴。不能到也。是終無由見知於世也。方且真偽雜而美惡混。不過榮其外而已。尉乃鑒之別之。愛之重之。與天下之有識者。更拂拭而贊歎之。故天下之爲物。有不必榮於天子之宮。而細于尉之手者。嗚呼。適合之道。誠難與俗人言也。余嘗觀之。其細密有堅致。非近世所能爲。竹瀟灑神韻。旁有石壁落而遠。其爲管夫人作無疑。管夫人。趙文敏之妻也。文敏以宋宗室仕元爲顯官。今所傳者翰墨滿天下。豈當時矜重而求索不獲。辭耶。抑文敏夫婦借以爲其彼委離離之感耶。何其有閒情而爲此也。然當時仕之以顯官。矜重其翰墨。而卒使之消遁於藝事。不愛不戚。夫婦偕老。嗚呼。當時之所以待勝國者厚矣。凡此皆可記者也。余因爲之記。順治庚寅商邱雪苑侯方域書於蕉葉山房。

民族詩話

中華民國廿八年十月十五日出版

著者 雷 調 元

主編者 錢 夫

出版者 風雨書屋

發行者 中華大學圖書有限公司

上海東波路一三〇號
電話 一五〇一五號

定價法幣二角半